

同州府續志

一
函
六
冊

同州府續志卷十二

列傳下

馬永亨字子健韓城人嘉靖甲子舉人知房山縣性介而方常祿外一塵無溜遷河閒丞三攝郡篆庫有羨金亨睨之若浼陞常德知府五年倦勤而歸帝爲加副使銜蓋寵之也喪配二十年鰥居不置婢宦三十年不一過里閭爲杯酒歡人皆難之

以下韓城

薛亨字道行辛酉鄉舉第一隆慶中進士授戶部主事督餉甯武餉賦金粟各半屬當款貢又戊卒築隄當倍給議

加賦執不可裁甲馬芻秣溢額者大司徒嘉其能著爲令
改兵部武選司擢山西提學僉事教先德行而後文藝以
齋膳之羨置學田周士不給者遷副楚憲過家以其祿爲
宗人輸租置義田義學義塚旣入楚正經界繩兼并商無
濫出吏無橫斂民困大蘇冬如京師計吏弁虎冠若而人
寬小吏半食以下不問遷四川參政奉檄問播寇楊應龍
罪錮之應龍詭以征倭自贖當事者執法許之陰行金於
亨家亨以聞兩臺言寇反覆宜早爲備後數年播事潰裂
卒如其言遷按察使治汾州強宗斂手受要束乃增陴浚

隍請陞州府彈壓之平獄數十百人遷河南轄決筦庫宿
弊爲晉人忌者所議坐罷歸署所居堂曰敬忍於世事一
無所問

張邦俊字襟黃萬厯乙未進士初授御史時抗言起廢棄
廣用賢請出閣講學皆人所不能言者又疏請增浙閩秦
齊解額四省各得五人增會額天下得五十人定爲例劾
稅瑞梁永高淮救直臣王邦才等俱載國史人尤難之
解經邦字叔憲萬厯中進士授嶧縣令嶧爲魯疲邑田蕪
民徙且盡逋賦至二萬經邦爲請捐積逋緩其征民稍集

卽爲建屋市犢具耒勸耕計創官庄三百二十七開蒔田
二千二百二十四頃有招墾之議十逋荒之議十省刑省
罰之箴二入爲戶部主事於行籍餞金八百留饗軍在部
督海新二倉塞諸竇節羨六萬以富庾陟郎中尋爲易州
兵備參政遷陽和右布政陞宣府巡撫宣古上谷地兵驕
情經邦按部治之又甯武援軍離雁門卽肆掠入疆且囂
經邦以練甲三千壁郊取罪人縛首惡八人立寘之法以
一繡弧導之疆外疏請天下援兵所過制撫得行法上是
之加兵部右侍郎經略遼東且行史太夫人病劇歸經邦

爲人廉約愛人政有惠家無積尤好施人多賴以舉火時
以賞資鼓倡立功名者素喜讀易春秋盈虛邪正閒數致
意焉著有嶧陽條議二省箴雲中校武策儀曹奏稿撫宣
奏議中和堂集

吳永圖字維懷萬厯癸酉舉人爲榆杜知縣榆素疲邑圖
培養之嚴緝盜申鄉約課士勸農恤孤拯弱聽訟平允不
罰一贖辨吳子誠之冤出曹封野之獄發徐貞女之誣榆
民稱爲吳青天審編里役獨宿公所集里老戶甲詳定上
下硃書定之催徵類報空數大戶託以匿私乃令大戶什

排眼同報數亦以硃筆書簿南關馬頭十四名最爲苦差
秉公審定民皆帖然潞安張通判欲入大戶罪意有所覲
也力爲之辨張啣之又遼守巡道以其不通禮餽遂註下
考辛卯冬左遷晉府審理圖怡然曰天下無不了之局吾
何以官爲哉居榆三年行李蕭然一夫肩入一夫肩出歸
農四十年囊無一錢漠不介意

薛國觀字賓廷萬厯乙未進士授萊州司理發覺白蓮教
就嚴歸養日逆闖圍韓城甚急國觀捐金鼓勵禦守城賴
以全又疏請磚甃邑城首倡捐貲助工不以累民在諫垣

中著鯁直聲厯陞都察院僉都御史太子太保吏部尙書
武英殿大學士清介端方苞苴不入請託不行上初寵遇
甚隆後以他事致謗賜自盡天下惜之

高愉字泰吾初爲諸生倜儻有氣節事父母至孝天啟末
歲荒愉鬻產得百金悉以賑之縣令王徵俊高其義申請
敕建尙義坊以旌之尋以勇略攝韓邵營事歲復荒餉不
至愉多方周恤全活甚衆軍兵不譁城保無恙

趙春芳天啟甲子舉人爲許州學正署州事闖賊攻城芳
固守闖賊曰汝順之吾令爲刺史否則城破碎汝骨芳曰

同州府志卷三
四
吾食明祿能爲賊臣乎生卽弗滅汝吾爲鬼將斷賊頸闖
賊怒急攻之城破被執大罵不絕遂遇害

李燦字斗明天啟中進士歷官汝甯知府有德量寡言笑
時流賊屢薄城下守備甚嚴調平陽捐貲修城不派州縣
人尤稱之

李國琮字象坤庚午舉人河南許州學正代篆滎陽蠲俸
修城置火器不逾月大賊雲集四面環攻卒賴保全又剪
滅八府通家蔡和羹蔡從龍縣人慶更生爲樹碑建生祠
解光纓字端甫性端謹師事韓令左懋第以名節相勉會

賊難避地晉中日給義士圖刺賊晉撫行視軍纓往說謂
長安雖陷三邊宿重兵兵將中豈遂無顏真卿郭子儀其
人者願以忠義檄三邊令會勦未果賊攫縉紳金匿之者
多波及挺身往見賊不少屈繫長安掠以刑備極苦楚終
不屈賊壯之適有爲賊策餌衣冠收人心者檄令受職纓
不應辭氣益烈賊不能平遂遇害

高來鳳崇禎丙子舉人歷官鎮江知府時江上初議防守
來鳳任事能斷兵民安集聽訟明決獄無滯留補順德知
府卒於官居鄉醕謹平易人無怨讟

賈淵遇少婦失金環泣覓於路執淵拾其遺且云環關軀命淵憐其急以妻環給之後婦拆衾獲前環偕夫詣淵謝且償環一時喧動里閭邑令王鼎聞之推爲鄉賓

賈締芳字懷伯貢生御史宏祥子少從盤屋李中孚遊篤實誠懇以朋友爲性命年三十六卒著有思誠錄邵陽康无疾推以古君子稱其爲韓後來理學首倡云

高世弼字五軒歲貢生世徵字久菴增廣生同胞兄弟也少從懷伯與鄠縣王心敬交得聞二曲之學由是兄弟一堂自爲師友家庭嚴肅步履矜慎一時推爲道範世弼性

側岸不羣毅然獨立異己者或非笑不顧也世徵嚴以治己和以處衆不爲清谿矯異之行而人自無不服焉

強嶽立字健齋國學生少從賈懷伯交鄆縣王心敬遂受業焉仗義疏財尊賢敬士一時名宿皆與爲交嶽立起微家巋然自立或聞有口過人益忌之然以視世之言肆行苟頽然自廢於孔牆之外者其高下爲有閒矣

晉賓王字德明諸生性狷介負奇氣棱角峭厲人望而畏之聞馮恭定公講學長安與晉絳辛復元金明趙廉夫負笈從遊鼎革後隱居不出飲水樵山自號盤龍逸民性至

孝持親喪六年不入內臨終自反曰生平學問此時方見
解允樾字拙存天啟戊辰進士授翰林編修爲人孝友眞
摯雄才博學不可一世丁父艱扶櫬出都步行泥中因成
疾鼎革後隱居太華龍門閒讀書不輟稱韓山樵隱與揚
州姚公思孝時相往復有遺史二老之目尋山問水每多
吟咏而故國新亭青山白髮一篇之中三致意焉初闖賊
入關繫紳士徵金允樾誓不辱預爲墓誌銘又手書座右
一聯云身爲侍從之臣世受國恩忍負皇明一死代有貞
白之譽恪承父訓長留清範千秋後卒不死者以有老母

在也

趙翔鴻字沖之天啟辛未進士宰武陟以忤璫降淮安檢校尋陞司李以直去鼎革後屢徵不起率以疾謝疾篤自爲誌銘稱處士云

孫必達字成章崇禎甲戌進士授臨潁令闖變後遁跡巖阿長吏求一見不可得杜門不出者凡三十年

衛靖中字翊明天啟丁卯舉人歷河南推官變後隱居不出又衛昌開崇禎時副榜鼎革後與其師延安推官顧咸正出遊不知所終

同州府志卷三
孫沅字元圃諸生甲申後高尙不出爲人剛正能以禮正俗尤重然諾慷慨雄激嶽嶽動人有故紳以事籍其家妻子入旂沅易田產得百餘金贖之而與紳初不相知也負笈訪友徒步遊江淮客死白門所著有野史刻之以傳皆記明士大夫屈身從闖而彈冠授職者

劉士藻字潔齋諸生受業安邑曹眞予先生之門性磊砢峭岸與人寡合人亦莫敢近甲申後杜門不出教授生徒以自給日晡不火宴如也時號勁節先生又諸生强景琦强秉乾李湛本李鵬霄楊青衛姬疆皆高尙不出景琦曾

遊曹眞子馮恭定二先生之門姬彊黃冠遠遊暮年始歸
王被徵張少保士佩公家僮幼從少保略知文字闖賊陷
京師徵詣少保墳哭叩曰僕從主人食先朝澤久今主之
主已崩僕不忍苟生也不食數日死

劉蔭樞字相斗康熙丙辰進士初授蘭陽令報最入諫垣
章數十上皆關大計旋出分巡贛南除私收門稅贛南米
市有牙帖銀協濟定南蔭樞計歲入置田以租充額牙稅
遂永除擢雲南按察使進布政使出納廉平官吏無敢貪
墨尋撫黔以歲惠服諸苗遠邇帖服康熙五十四年西北

用兵連歲不解蔭樞上疏請罷兵忤 旨詔出玉門親相

機宜時年已八旬邊地苦寒以病辭遂獲罪 詔屯田塞

下歷三年還東師六十一年與千叟宴雍正初賜金歸里
蔭樞爲人篤誠真率廉而不劔貴不自居其居鄉也與鄉
之老者把酒論舊拍掌笑呼若不自知爲貴人者年八十
七卒

陳謀字獻可乾隆十三年進士授四川彰明知縣講學訓
士以惻惻爲政涪水逼城築長隄扞之縣城二門民弗便
爲更開西北二門使得四達後任河南靈寶項城等縣所